



BRUNCH ZALZERSHAOF 2011

Maar, maar, maar, waat veel det taege dit jaor, genne tombola nao de brunch.

Nao zó'n deur jaor dinkse, dae clubkas kin waal waat pieke gebroëke..

Dus heb ik ut ganse jaor allerhande prièze verzameld. Mien ald-collega's, familie, buure en vrinde deeje allemaol spontaan mei.

In ut kerspakkert zit altièd waal iets leuks of iets lekkers wao se zelf niks mei duis en wao unne andere bliej mei is.

Zelfs Jan de Bouvrie had un schemerlamp gesponsord, toch neet de ièrste de beste zoelse zegge.

Ik meinde det veuroèdinke un gooje eigeschap waar, maar wie ein venloos spraekwoord zaet: "**Met meine bescheet d'r zich ens eine**".

Dus veuroèdinke doon ik beej Rapido neet mièr.

Maar ik heb de "voedselbank" al gebeld.

Die hadde waal waat adresjes veur al die prièze en eine gooje daad veur 2011 is alvesses gedaon.

De brunch ging gelökkig wáal door en ut motto makde vuël good:

2011 Kièk ens naor dich zellef, det heb ik meteen gedaon en ut waar bes lastig op sômmige plekke um dich te bekièke.

De zaal in Zalzershaof waar gezellig aangekleid en de brunch prima verzörg.

13 **kids** hadde zich opgegaeve en die mochte netuurlik mei aanschuuve.

De **blage** kreges zelfs mini-worstebuëdjes en de **kinder** mochte zich auk nog un pasteitje pakke.



Toch ware de brunches vruèger beej de Witte auk altièd erg gezellig.

We zoote toen neet zoë good in de slappe was en alles woort in eige beheer gedaon.

Ut waar dök vuël werk maar de dames van ut bestuur en tig vrijwilligers makde same de zaal in orde en zörgde everal veur.

Ik kin mich de boerebrunch herinnere, ik gluif in 1995.

Baove de entree aan de waslien hông un jaeger ônderboks, unne stevige BH, mäötje 100FF en nog waat degelikke was.

2 Struise boeredames stônde tösse de stroëbale um de gaste welkôm te heite.

De club waar un stök jônger dus d'r ware auk vuël kinder die tössedoor un optraeje hadde met eur eige meziëkinstrumente.

De gebroeders Doesborg brachte un complete play-back show waobeej Rob en Helmi as coach ut net zoë drök hadde as de artieste zelf.

De zôndaag deurde lang want as ut gezellig is bliefse gewoën hange of staon net waasse woels.

Tössedoor woort d'r veur de variatie auk nog gedans, ut is tenslotte un sportvereniging.

Rônd 18.00 oor kwame de euvergebleve buëdjes, de krintemik en ut roggebroëd teveurschien.

Besmaerd met andere brunchrestante ginge die vlot van de hand of eigenlijk in de mônd. Rônd 20.00 oor kwame de kinder, meug van ut boète speule en den boèk vol snoep naor binne.

De elders, die intösse blauw ware van.....ut brunche, ginge dan meug en tevreeje met eur jeug naor hoès.

Lekker op de bank met de bein gestrek oètröste van dae vermeujende zôndaag.

Nostalgie..... maar nae, gewoën leuke herinneringe.



2010 waar un gezellig jubileumjaor waobeej de reünie in april en de feesdaag van 25 september op nummer 1 staon.

Zelfs de köskepel haet un niej pekske gekraege, ik weit nimmer of det noow "made in China" of gewoën in Venlo gemak waar.

De meziék klônk in elk geval utzelfde.

Stel dich veur un reünie waobeej se normaal contac hebs met idderein zônder sms, hyves, twitter en zônder face-book.

D'r loog waal un groët gezichtebook van de clubleeje met echte foto's op de taofel, det waar ièrliek gezag sôms schrikke.

Gewoën alderwets van man tot man/vrouw beejpraote, dich aankièke, elkaar un hand gaeve of kösse det soort contac huürt beej Rapido.

Det geit auk zoë op de film-aovend in fibberwari, gezellig



hè.

Elly van Elswijk